

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
(छत्तीसगढ़ी)

18.10 गुरुवार

दिनांक 26.09.2024

प्रमुख समाचार –

- 1– एक राष्ट्र–एक छात्र के तहत हरेक पढ़इया छात्र मनके पहिचान बर यूनिक आईडी दे जाही–योजना तीन चरण म होही लागू।
- 2– राज्य सरकार ह न्यूनतम वेतन अधिनियम के तहत मजूर मन बर वेतन अउ परिवर्तनसील महंगाई भत्ता के दर एक अक्टूबर ले करही जारी।
- 3– विश्व पर्यटन दिवस के मउका म काली नई दिल्ली म केंद्रीय पर्यटन मंत्रालय डहार ले प्रदेश के बस्तर जिला के दू ठिन गांव ल बढ़िया काम के सेति करे जाही सम्मानित।

समाचार विस्तार ले

विद्यार्थी–यूनिक आईडी

एक राष्ट्र–एक छात्र के तहत हरेक पढ़इया छात्र मनके पहिचान बर ओमन ल यूनिक आईडी दे जाही। एखर बर ऑटोमेटेड परमानेंट एकेडमिक अकाउंट रजिस्ट्री आईडी–अपार के योजना देसभर म लागू करे के तियारी सुरू कर दे गेहे। ए योजना तीन चरण म होही। पहिली चरण म कक्षा नवमीं

ले बारहवीं तक दूसर चरण म कक्षा छठवीं ले आठवीं तक अउ तीसर चरण म पहिली ले पांचवी तक के पढ़इया छात्र मनके यूनिक आईडी बनाय जाही। ए योजना के उद्देश्य राष्ट्रीय शिक्षानीति म छात्र मनके बने विकास अउ पढ़ई-लिखई के निगरानी करना हे। अपार आईडी योजना के कामकाज के बारे म छत्तीसगढ़ शासन के स्कूल शिक्षा विभाग डहार ले जम्मो जिला कलेक्टर मन ल निरदेस जारी कर दे गेहे।

अपार आईडी ल डिजिलॉकर ले जोड़े जाही, जेखर ले छात्र मनके पढ़ई-लिखई, परीक्षा परिणाम, रिपोर्ट कार्ड अउ आने डिजीटल रिकार्ड सुरक्षित रइही। केंद्रीय शिक्षा मंत्रालय ह जम्मो स्कूल मन ल निरदेस दे हे कि तीन अउ चार अक्टूबर के पालक शिक्षक मनके बइठका राखके छात्र मनके अपार आईडी बनाय बर मंजूरी लेवय। सहमति पत्र के आधार म स्कूल के हेड मास्टर या प्राचार्य यूडाईस प्लस पोर्टल उपर जानबा क्लिक करे ले आईडी खुदे तियार हो जही। अइसन छात्र, जेखर मन तीर आधार कार्ड नइ हे उंखर मन बर बिसेस सिविर राखके आधार पंजीकरण कराय जाही।

एनएसएसओ-बेरोजगारी आंकड़े

केंद्रीय सांख्यिकीय अउ कारीकरम कार्यान्वयन मंत्रालय ले अवइया राष्ट्रीय नमूना सर्वेक्षण संगठन-एनएसएसओ डहार ले करे गे सर्वे म छत्तीसगढ़ ल देस के सबले कम बेरोजगारी दर वाले राज्य म पांचवा जघा मिले हे। ए सफलता उपर मुख्यमंत्री किहीन हे कि राज्य सरकार डहार ले करे गे बढ़िया परयास के सेति ए परिणाम मिले हे। ओमन किहीन कि राज्य

सरकार ह प्रदेश म युवा मन ल रोजगार के अउ जादा मउका देवाय उपर जरूरी कदम उठाही। विसेश रूप ले गांव—गंवतरी अउ आदिवासी क्षेत्र मन म रोजगार देवाय उपर योजना चलाय जात हे।

श्रमिक—वेतन दर

राज्य सरकार ह न्यूनतम वेतन अधिनियम के तहत मजूर मन बर न्यूनतम वेतन अउ महंगाई भत्ता के दर जारी कर देहे। श्रम आयुक्त अलरमेल मंगाई डी. ह आने—आने अनुसूचित नियोजन मन म काम करइया मजूर मन बर एक अक्टूबर ले परिवर्तनसील महंगाई भत्ता जारी करे हे। जारी नवा दर के मुताबिक पैतालिस ठिन अनुसूचित नियोजन मन म काम करइया मजूर मनके महंगाई भत्ता म हर महिना अड़तालिस रूपिया के बढ़ोत्तरी होही।

श्रम मंत्री—ईएसआईसी

आज मंत्रालय म कर्मचारी राज्य बीमा निगम ईएसआईसी के क्षेत्रीय परिषद के बइठका होइस। बइठका म श्रम मंत्री लखन लाल देवांगन ह पंजीकृत मजूर अउ ओखर परिवार मनके बने स्वास्थ्य सुविधा देवाय के निरदेस अधिकारी मन ल दीन। ओमन किहीन कि अइसन व्यवस्था बनाय जाय जेखर ले मजूर अउ ओखर परिवार वाला मन ल अस्पताल ले सोज्झे बड़का अस्पताल म एडिमिट करे जा सकही। ओमन बस्तर म जल्दीच

ईएसआईसी आफिस अउ अस्पताल के संगेसंग प्रदेस के लारा, खरसिया, तिल्दा अउ उरला म चार ठिन नवा अस्पताल सुरू करे के निरदेस दीन।

पर्यटन राष्ट्रीय सम्मान

विश्व पर्यटन दिवस के मउका म काली नई दिल्ली म केंद्रीय पर्यटन मंत्रालय डहार ले 'द बेस्ट टूरिज्म विलेज कम्पटिशन' के आयोजन करे जाही। एमा बस्तर जिला के ढूढमारस ल एडवेंचर टूरिज्म के क्षेत्र म अउ चित्रकोट ल सामूदायिक आधारित पर्यटन म बढ़िया काम के सेति सम्मानित करे जाही। छत्तीसगढ़ के ए दूनो गांव राज्य के सांस्कृतिक धरोहर अउ प्राकृतिक संपदा के चिन्हारी हरय। चित्रकोट के प्रसिध्द जलप्रपात पर्यटक मन बर बिसेस आकर्षण के केंद्र बने हे, त उहें, ढूढमारस गांव अपन एडवेंचर टूरिज्म बर प्रसिध्द पाय हे। मुख्यमंत्री ह ए सफलता उपर प्रदेस के लोगन मन ल बधई दीन हे।

मुख्यमंत्री—जशपुर

मुख्यमंत्री विष्णुदेव साय ह आज जशपुर जिला के गांव बगिया म आठ करोड़ पचपन लाख रूपिया के आने—आने विकास काम के लोकार्पण करीन, जेमा कुनकुरी विकासखंड के गांव कुंजारा, ढोकड़ा अउ साहीडांड म नवा बने विद्युत उपकेन्द्र घलो सामिल हे। संगेसंग मुख्यमंत्री ह कुनकुरी म उप क्षेत्रीय भंडार अउ सन्ना म नवा बने तहसील कार्यालय भवन के लोकार्पण करीन। कुनकुरी म बिजली के उपकेंद्र बने ले ए गांव के लोगन मनके

बिजली के समस्या ह दूर होही। त, उन्हें, सन्ना म नवा तहसील कार्यालय बने ले राजस्व के मामला के निपटारा जल्दी हो जही। अइसने कुनकुरी म उप क्षेत्रीय भंडार स्थापित होय ले ट्रांसफार्मर के संगेसंग आने बिजली मसीन मिले म आसानी होही।

कारीकरम म मुख्यमंत्री ह सौ झिन कुंभकार सिल्पकार मन ल मुफत म बिजली ले चलइया चाक बांटिन।

स्वच्छता ही सेवा

“स्वच्छता ही सेवा” अभियान के तहत प्रदेश म आने—आने कारीकरम राखके लोगन मन ल साफ—सफई के बारे म बताय जात हे। पद्मश्री फूलबासन बाई ह बतइन कि राजनांदगांव जिला के मां बम्लेश्वरी जनहित कार्य समिति ह लंबा बेरा ले साफ—सफई के क्षेत्र म काम करत हे, जेमा दू लाख माईलोगिन मन जुड़े हवय। ओमन प्रदेश के लोगन मन ले साफ—सफई राखेके अपील करे हे।

ओति, सुकमा जिला म स्वच्छता ही सेवा अभियान के तहत स्वच्छता रैली निकाल के लोगन मन ल सपथ देवाय गीस अउ संगेसंग स्वच्छता चौपाल, रंगोली, निबंध अउ भाषण प्रतियोगिता जइसन कारीकरम करे जात हे। ए कारीकरम मन म गांव ले जुड़े शिक्षक, आंगनबाड़ी कार्यकर्ता, मितानिन, स्व—सहायता समूह के माईलोगिन मन अपन भूमिका निभावत हे।

त उन्हें, सरगुजा जिला के गुमगराकला गांव म विधायक अउ कलेक्टर के अगुवई म स्वच्छता कारीकरम राखे गीस।

अइसने, सारंगढ़-बिलाईगढ़ जिला म स्टेट बैंक के साखा प्रबंधक कोति ले स्वच्छता मित्र सुरक्षा सिविर के आयोजन करे गीस।

पोषण माह

राष्ट्रीय पोषण माह के तहत महासमुंद जिला म “सुपोषण से कोई बच्चा छूटे ना” अभियान चलाय जात हे। एमा आंगनबाड़ी केंद्र के लइका मनके संगेसंग प्राइवेट स्कूल मन म पढ़इया लइका मन के घलो वजन करे जात हे। इही कड़ी म इमलीभाठा म चलाय जात एक टिन प्राइवेट स्कूल म आंगनबाड़ी कार्यकर्ता मन ह लइका मनके वजन करीन।

उहें, सक्ति जिला के नवा बिहान समूह के माईलोगिन मन ह पोषण रैली निकाल के लोगन मन ल जागरूक करीन।

वित्त विभाग-भर्ती

वित्त विभाग ह न्यायालय मन म खाली पद ल भरे बर नवा भरती के मंजूरी दे देहे, जेखर बाद न्यायालय मन म तीन सौ बांसठ खाली पद म भरती करे जाही। जेमा व्यवहार न्यायाधीश के संतावन, स्टेनोग्राफर के छियालिस, सहायक ग्रेड तीन के एक सौ अट्ठारा, स्टेनो टाइपिस्ट के सात पद सामिल हे।

रायपुर डाक संभाग-थैला

भारतीय डाक विभाग के रईपुर डाक संभाग बर स्वच्छता से श्रेष्ठ सेवा के तहत प्लास्टिक थैली के जघा म कपड़ा के थैला देके अभियान के सुरुआत करे हे, जेमा आम लोगन मन बर रईपुर के बैरन बाजार पोस्ट आफिस म मूफत म थैला सिलाय के सुविधा मिलत हे। ए सुविधा दू अक्टूबर तक दस बजे ले संझा पांच तक रोजे होही। कोनो भी मनखे मन जुन्ना कपड़ा लाके जादा ले जादा दू ठिन थैला सिला सकथे।

संक्षिप्त समाचार

अउ अब थोरकुन समाचार सार म –

— छत्तीसगढ़ व्यावसायिक परीक्षा मंडल डहार ले उनतीस सितंबर के होवइया मत्स्य निरीक्षक के लिखित भर्ती परीक्षा कोनो कारण ले स्थगित कर दे गेहे।

— कोंडागांव जिला के केशकाल पुलिस ह गांजा तस्करी के मामला म दू झिन आरोपी मन ल गिरफ्तार करके ओखर तीर ले छत्तीस किलोग्राम ले जादा के गांजा बरामद करे हे।

अउ

– जशपुर जिला के आगडीह गांव म जंगली हाथी के हमला म एक झिन मनखे के मउत हौगे ।
